



- EDITORIAL • RÂL VÊNGTU • CHHÛNGKAW CHANCHIN
- » Aizawl Theological College-in MTh leh BD result tichhuak
- » Synod Revival Meet Vawi 8-na tluang taka hman a ni
- » Synod Higher Secondary School Multipurpose Hall hawn a ni

RNI 68092/83 Regn. No. N.E. 1024
 From
 Synod Literature & Publication Board
 Synod Office, Aizawl - 796 001
 Mizoram. Phone: 0389-2324590

SYNOD *Newsletter*

Volume XXXIV

No. 7

E-mail: synodnews@gmail.com

JULY, 2019

LÂWRKHAWM

PARTNERSHIP COMMITTEE

• July 5, 2019 khân Mizoram Presbyterian Kohhran leh Karbi Anglong Presbyterian Church (KAPC) thawh honaa Committee din (Partnership Committee) chu Diphu-ah an thû a, Mizoram Synod lam aţang hian Synod Moderator Rev. R. Lalhmingthanga, Synod Secretary (Sr.) Rev. R. Vanlalngghâka, SMB Secretary Rev. C. Zoramawia leh Karbi Anglong F/S Rev. F. Pachhûnga te an kal. Thawh hona Thuthlunga tihdanglam ngai rawtna chu KAPC-in an Committee sanga thlen tûra tiin Committee hi tluang taka zawh a ni.

ROUND TABLE CONFERENCE

• June 26-29, 2019 chhûng khân Presbyterian Church of Myanmar (PCM)-in khawvêl hmun hrang hranga a thawhpui kohhran aiawhte sâwmin 'Round Table Conference' an buatsaih a, Mizoram Presbyterian Kohhran Synod aţangin Rev. B. Sângthanga a kal. He Conference-ah hian Scotland, Ireland, Singapore, New Zealand, Malaysia leh Taiwan aţangte pawhin an kohhran aiawh an kal thei a, Japan, South Korea, USA leh UK aţanga kal tûra beiseite erawh chu an kal thei lo. Anmahniho (PCM) mi leh sate nêen mi 27-in Conference hi an hmang. PCM hian an kohhran rawngbâwna chanchin an sawi a, zawhna leh chhânna hun hman a ni a. Hêng bâkah hian an ramin harsatna a tawh, thil chi hrang hrang sawi hona hun tha tak hman a ni.

TAIWAN THALAITE NÊNA INTLAWH TAWN

• Central KTP hruaitu pathum leh mi dang pahnihte chu Taiwan-a Ecumenical Youth Exchange (EYE) Programme hmangin June 28-July10, 2019 chhûng khân Taiwan-ah an kal. Kristian Thalai Pawl leh Presbyterian Church in Taiwan (PCT)-a thalaite hian intlawh tawn programme (EYE) hi hun eng emaw chen aţang khan an lo kalpui tawh a. Kuminah hian Central KTP hruaitu - T. Upa Rochungnunga, Gen. Secretary, Dr. Lalrotluanga, Treasurer leh T. Upa Lalmuanawma, Finance Secretary te leh Pu F. Vanlalrochana, Zotlang, Aizawl leh Ni. Vanlahmangaihi, Laipuitlang te an kal.

DURLANG BSUP BUILDING CHIM TUARTE THANPUINA

• Mizoram Synod chuan July 2, 2019 tlaia Durlanga Basic Service to Urban Poor (BSUP) Building chima thi pathum chungte hnenah sing nhieh theuh leh hliam tuar pathum hnenah cheng sang riat theuh Relief Fund aţangin a pe.

SYNOD HOSPITAL-AH NURSE HNA ZIRNA COLLEGE HAWN A NI TA

** August ni 1, 2019-ah B. Sc. (N) class tan a ni ang*

June 20, 2019 (Ningani) chawhnu dâr 1:00 khân Synod Moderator Rev. R. Lalhmingthangan Synod Hospital Auditorium-ah College of Nursing, Synod Hospital a hawng. Hawna inkhâwm hi Dr. L.H. Thanga Singson, Synod Hospital Director-in a kaihruai a, Pi C. Lalrintluangi, Principal-in Nursing College lo pian dan chanchin a sawi hnuah Synod Moderator Rev. R. Lalhmingthangan Nursing College chu hawngin thuchah a sawi nghâl. Rev. B. Sângthanga, Executive Secretary i/c Hospital-in tawngtâiin college thar a hlan a, Mizoram Synod Choir te thiam taka an zai zawhah Upa F. Lalsângliana, Synod Hospital Co-ordinator-in lawmthu a sawi a, Rev. R. Vanlalngghâka, Synod Secretary-in malsâwmnain inkhâwm a tîn a ni.

Synod Hospital-a nurse zirna chanchin leh College-a hlân kai a nih dan, Principal-in a sawi chu, a tlângpuiin hetiang hi a ni:

Kum 1928-a Welsh Mission Hospital (tûna Synod Hospital ni ta hi), Dr. John Williams-a ten an din tih khân hna thawk paha nurse hna zir tûrin Pi Khuangi (kum 16 mi) lâk a ni a. Wales ram aţanga missionary nurse lo kal hmasa ber, NI Winifred Margaret-i chu kum 1929 January ni 7-ah Mizoram a lo thleng a, missionary nurse dang an lo chhuak zêl a, nurse zirna pawh a phuisui tial tial a.

Kum 1938-a Dr. Gwyneth Parul Roberts (Pi Puii) a lo thlen hnuah phei chuan nurse hna zirna changtlung zâwka kalpui chu hna hmasaah neihin tan a la nasa hle a. Sawrkâr lam pawhin nurse zirna tlâkah ngaiin kum 1944 khân Indian Nursing Council, New Delhi chuan nurse zirna

putling ni tûrin a pawm a. India hmârchhakah nurse (GNM) putling zirna sikul hmasa ber pâwl leh sawrkâr (IMC) recognition nei hmasa ber pâwl a ni a, Mizoram bîkah phei chuan kum tam tak chhûng nurse zirna awm chhun a ni.

Kum 1944 aţangin Diploma course, General Nursing & Midwifery (GNM) zirna tan a ni a, GNM hi mi 1000 chuang zetin an zir chhuak tawh. He hmuna zir chhuakte hi Mizoram chhûng bâkah India ram hmun hrang hrang leh ram pâwn lam thlengin hna thawkin an chhuak a, missionary nurse-a chhuak pawh za têt an awm. Zirna hmuna inkaihruai dân leh inzirtîr dân hi hautak deuh mah se an zir chhuah hnuin an thawhnaten an fak viau zêl a, chu chuan he hospital-a nurse zirna hi a tihmingtha tîn a ni.

Synod Hospital-a Nursing School-hi a din tih, kum 1928 aţangin Assam Nursing Council-



Phek 2-naah chhuzawm a ni...

SYNOD Newsletter

EDITORIAL STAFF

Rev. Dr. C. Chawngmingliana

Rev. B. Sângthanga

Upa H. Ronghâka

Upa C. Thanga

Editorial

NI TIN MAMAWH

Vawi khat chu Juda sakhaw zirtirtu Ben Jochai-a hi a zirlai (student) pakhat hian, "Eng vângin nge Pathian khân Israel fate kha kum khat daih Manna pe lova ni khat ei tâwk lek lek a pêk?" tiin a zawt a. Ben Jochai-a chuan tehkhin thu hmangin hetiang hian a chhâng a, "Lal hausa tak mai pakhat hian kum khat tla tâwk tûr a fapa hnênah a pe a. A fapa chuan a pa chu kum tin vawi khat a rawn tlawh thîn a, chu pawh chu a mamawh lam tûr chauhvîn. A pa chuan kum khata vawi khat chauh a fapa a hmu thîn chu a lungni chiah lo deuh va. Chal dawm meuhva ngun taka a ngaihtuah hnu-ah tih dân a thlâk ta a. Ni khat tla/daih tâwk tûr chiah a pe ta a. A fapa chuan a pa hmangaihna leh duhsakna chu ni tin a mamawh ta a, ni tin a pa inah chuan a kal ta a. Chutiang bawh chuan Pathian hian Israel fate leh amah ringtute pawh hi ni tin a thar zêla kan mamawh min pêk a duh a ni," a ti a.

A ni tak a, tûnlai pawh hian faten nu leh pa an hnaih sauh sauh hi chuan mamawh an nei a ni ang ti ila a sual lo tlângpui. Phai lama lehkhah zir tûra awm naupang tam tak pawh hi an bank account-ah pawisa a tam deuh chhûng chuan Puallênga thlangtla ang vang vang an ni. An hman zawh dâwnah nu leh pate an rawn be leh mai thîn. Fate nêna inthlun zawm reng kan duh chuan an mamawh tâwk tê tê kan pêk a tha hle ang.

Malsâwmna dawn tam lutuk pawh hi Pathian nêna kan inlaichinna tichhetu a ni thei. Chhûngkua leh mi mal harsatna Pathianin min chin felsak ngêl vek zêl lohna chhan pawh hi Pathianin ni tina amah kan biak theih nân a ti pawh a ni mai thei. Tawngtaia Pathian kan biak/dâwr reng theih nân kan mamawh tâwk tê tê-in ni tinin min pe thîn a lo ni.

PES DINHMUN TLÂNGPUI

Presbyterian English School (PES) dinhmun tlângpui hetiang hi a ni:

SEC phalna nei PES zât - 140; Zirlai awm zawng zawng - 31,832; Zirtirtu zawng zawng - 1,623; Thawktu dang - 142.

Kumin 2019-a PES Grant pêk dân:

Building Grant 2nd Installment PES 13 te hnênah Rs. 3,00,000/-; Lump Sum Grant PES 20 hnênah Rs. 1,50,000/-; PES 92 hnênah Rs. 1,20,000/-; a vaiin Rs. 1,40,40,000/- pêk tawh an ni. Adhoc Grant PES 26 hnênah Rs. 30,000/- theuh pêk an ni bawh.

Phêk 1-na chhuzawm...

hnuaiyah kum 1990 thleng khân a awm a. Assam Nursing Council ațanga kum 1991-a Mizoram Nursing Council a indanin he Council hnuaiyah hian a awm zui a. Kum tinin en dik thîn a ni a, Indian Nursing Council pawhin a khât tâwkin an en dik bawh thîn. Kum 1992 leh 2001 inkârah INC ațangin wawi thum en dik a ni a, chûng en diktute chuan B. Sc. Nursing Course-a hlâng kai tûrin thu an râwn thîn a ni. India rama nurse zirna course chi thum awm hi pakhata hlawm khâwma, B.Sc (N) zirnaa siam vek tum a nih thu Indian Nursing Council ațangin lehkhah te pawh dawn a ni a.

Hospital Director leh Nursing Superintendent-ten an hun laiin Nursing College-a hlân kai a nih pawha zirtirtu hna thawh thei tûr an chher zêl a. Indian Nursing Council (INC) ațanga inspector-lo kal thînte thu râwn anga Nursing School ațanga College-a hlân kai chu kum 2002 Synod Inkhâwmpui chuan a lo remti ta a. Sawrkâr laipuiin Nursing School-te College-a hlan kai a tumna tikhawmuan a nih leh avângin chu chuan Synod hma lâkna pawh a nghawng a. Tûn hnaiah Ministry of Health, Govt of India-in Indian Nursing Council kalphung tur 'Circular' a tihchhuahah Kum 2020-2021 ațangin India ram pumah GNM zirna tihtâwp tûra tih a lo ni leh ta a. Kum 2017 Synod Inkhâwmpui chuan SEC rawtna angin Nursing School leh College kalkawp tûra lo rêl tawh pawh chu tidanglamin College-a hlân kai tûrin a rêl ta a, a bul țan nân budget-ah ₹ 30,00,000 (nuai sawmthum) dah a ni.

College-a hlân kai a nih theihna tûra tih ngai hrang hrangte chu a theih anga rangin bawh zui zêl a ni a, Mizoram Nursing Council (MNC) hotuten theih tâwp chhuahpuiin, Indian Nursing Council (INC) thupêk leh phalnain ni 31.5.2018 khân en dik a ni a. Inspection report zul zui hian B.Sc (Nursing) zirlai 30 lâk theihna tûra tihna (Suitability for Upgradation) hmuh a ni ta a ni. Ni 31.10 - 1.11.2018 chungin

M.TH. LEH B.D RESULT A CHHUAK (ATC leh MTC zirlaiten an ti țha)

Senate of Serampore College chuan kum 2018-2019 session-a zirlaiten exam result a tichhuak a, Mizoram Synod hnuaiyah College pahni - Aizawl Theological College (ATC) leh Missionary Training College (MTC) ațanga exam-ten an ti țha hle.

Aizawl Theological College ațanga Master of Theology (M.Th) zirlai exam 31 zînga 10-in First Class (A-)-ah an pass a, 21-in B+ (High Second Class)-ah an pass thung. Kumin hian ATC History-a a wawi khat nân M.Th Religions Department ațangin 1st class pahni an awm a, pakhat hi Naga hnam niin, pakhat zâwk hi Republic Vêngthlang nula Lalremruatfeli a ni.

Bachelor of Divinity (B.D) hi zirlai 27-in an exam a, First Class (A-) awm lo mah se, an result a țha hlawm hle. Zirlai 15-in B+ (High Second Class)-ah an pass a, Second Class (B)-ah 11-in an pass thung.

Missionary Training College ațangin Bachelor of Missiology (B. Miss.) zirlai 15-in exam an bei a, an vaia pass vekin First Class (A-)-ah pathumin an pass a, High Second Class (B+)-ah pakuain pass-in Second Class (Grade B)-a pass pathum an awm.

Indian Nursing Council, New Delhi chuan Inspector pahni rawn tûrin an report ațangin B.Sc (N) zirlai 30 zirtirtu theihna tûra rawt a ni leh a. Mizoram University-ah B.Sc (N) College din phalna (permission) dil ngêl a ni a, anni pawhin en diktute rawn tûrin, he Inspection report ațangin hianMZU Academic Council chuan B.Sc (N) zir theihna College din phalna (Provisional Permission) a pe ta a. Chumi tlawhchhan chuan Mizoram University-ah Provisional Affiliation dîl leh a ni a, Inspection Team tîr lehni ni 29.4.2019 khân an en dik leh a, ni 22.5.2019-a University Academic Council Meeting chuan kum khat atân Provisional Affiliation a pe ta a ni.

Hospital Board Committee chuan College enkawl turin member 10 awmna College Managing Committee a din a, Committee chuan College chhinchhiahna (logo) te, lehkhahu pawimawh leh zir tûr te, uniform leh College kaihhnawih chi hrang hrangte Committee sâng zâwka thlen tûrin an rêl thîn a ni. He B. Sc. (Nursing) zirna hi –

- Seat 30 awmin, Seat hnih hi EDG-BPL tâna tih (reserve) a ni.
- Indian Nursing Council (INC) Guidelines angin pawl 12 (10+2) Science (PCB) 45% chinin dîl theih a ni
- Nupui/pasal la nei lo, rilru leh taksa lama harsatna nei lo bawkten dîl tûr a ni.
- College rules bâkah hospital leh hostel rules chi hrang hrang zawm tûr a awm.
- GNM zir tûr lâk thar a ni tawh lo vang a, zir mêkte an chhuah vek hnuah GNM Course hi a tâwp ang. B.Sc (N) zirna college a ni tawh ang.

Tûnah hian NEC sum hmangin College building sak mêk a ni a, Indian Nursing Council duh dân angin laboratory, library, classroom leh office hrang hrang te ruahman a ni a, kum 2021-ah chuan luah luh hman beisei a ni. Kumin August ni 1 ațanga class țan tûr a ni dawn a, tûn thla hian zir tûr lâk fel a ni ang.

MIZORAM PRESBYTERIAN KOHHRAN DIN NI 'JANUARY 11' HMAN DÂN TÛR

Synod Executive Committee chuan Synod-in Mizoram Presbyterian Kohhran din ni atâna a lo pawm, January 11 urhsûn taka hman dân tûr hetiang hian a rêl:

- (1) Kum 2020 January 11 hian hun hnih neia thu zir ni se. 'Mizoram Presbyterian Kohhran țobul I & II.' Ziaktu atân Rev. K. Lalrinmawia ruat a ni.
- (2) Kum 2021 ațangin Nilai Thupui bua telh tûrin thu zir tûr ziah thîn ni se. Kum 2021-ah chhûn lamah 'Mizoram Presbyterian Kohhran leh Harhna' zir ni se. Zân lamah 'Mizoram Presbyterian Kohhrana ringtute' tih thu zir ni se.
- (3) Kum 2022-ah chhûn lamah 'Mizoram Presbyterian Kohhran leh Chanchin Tãa Hril'. Zân lamah 'Mizoram Presbyterian Kohhran leh ram hmasâwnna,' tihte zir ni se.

(SEC 280:34. June 4-6, 2019)

Râl Vêngtu

Mite chu Râl Vêngtu hnênah an lo lêng khâwm leh nak nak a. Râl Vêngtu hnênah chuan, "Râl Vêngtu, tlêm lai deuhva kan lo lên khân, 'lo lêng leh rawh u, ka sawi tûr ka la sawi zo lo' kha i tiin kan hria a. I thu leh hla ngâithla tûrin kan lo kal leh a ni," an rawn ti a. Râl Vêngtu chuan, "E! a ni tak e. 'Thu sawi thiam êm êm, hre bawk si, sawi ngaihnawm thiam bawk si' in tih ten in vênga thu an rawn sawi, ngâithla ve tûra min rawn sâwm tum khân in awm rei hman si lo va. 'In lo lêng leh dawn nia, ka la sawi zo lo' ka tih tak kha maw le," a ti a. Mite chuan, "Ni e, i sawi zawh loh tâk kha kan hre châk alâwm," an ti a.

Râl Vêngtu chuan, "Khatiang mite thusawi kha chaw tak khûka khûkpui chi vak a ni lo. Pathian thu hi chu hre bera inngaitte hian an hre thelh fo, sawi dik bera inngai te pawhin an sawi sual chawk. Pathian thu, Bible-ami duh lai lai châng la khâwma suih zawm chingte hian an suih zawm fuh lo fo bawk. Tûnlai pangpâr lem an siam hian a tak a ang thei hle, belh chian fê loh chuan a lem a ni tih hriat a har khawp asin! Khatiang mite thusawi pawh kha chutiang deuh bawk chu a ni. Chik tak leh uluk fe a in ngaihlhâk loh chuan Pathian thu dik ziktluak leh a lem in hre hrang thei lo vang. A thuhriamah Pathian thu hi hre ber leh hre êm êma kan inngaih lai hi chuan thlarau lam degree engmah pêk tlâk kan la ni lo. Kan hriat loh a tamzia kan hriat hunah thlarau lam B.D Degree kan dawng thei ang. Kan hriat aia tam daih zâwk hriat loh kan la nei tih kan hriat chhuah hunah thlarau lam M.Th degree. 'Hriat ka lo nei mang hlei nem maw le' tih kan hriat chhuah hunah thlarau lam Doctorate degree dawng tlâk kan ni chauh ang. Pathian thu hi eng ang pawhin zir nasain khel nasa mah ila, a taka nunpui tûr a ni e tih bâk chu zir chhuah tûr a awm chuang lo," a ti a. Mite chu lêng fuh inti takin hlim takin an haw leh ta rih a.

RESIDENTIAL CHOIR CONDUCTORS' TRAINING HRIATTIRNA

Synod Worship Committee chuan August 26 - 30, 2019 chhûngin Choir Conductors' Training a buatsaih leh dawn a. Dil duhte tân Synod Worship Dept. Office-ah dilna form lâk theih a ni a, dilna form-ah hian hriat tûr pawimawh târ lan a ni. Zir tûrte tân TA leh DA (kal lam leh haw lam) pêk an ni ang a, training chhûng chuan ei leh in tumsak an nih dawn avângin DA pêk an ni lo vang. Dilnaah Kohhran lehkhah thil tel tûr a ni.

Dilna hi Aug. 20, 2019 (Thawhlehi) thleng theh luh theih a ni ang.

Co-ordinator
Synod Worship Dept.
Ph. 9774636495

SYNOD HOSPITAL, DURTLÂNG THILPÊK DAWNTE (MAY, 2019)

I. CHARITY FUND:		2. KÏP, Rângvumal Branch		10 Units
1. Hliappui Pastor Bial Kohhran Hmeichhia	₹ 5,000/-	3. Govt. Chhâlthlang HSS, Aizawl		45 Units
2. J.N Thangkima, Chhânari, Lunglei	₹ 7,500/-	4. KÏP, Kanan Branch, Aizawl		42 Units
3. P.C Vânlalvêna te chhûngkua, Ramthar 'N', Aizawl	₹ 3,000/-	5. KÏP, Dinthar Branch, Aizawl		46 Units
4. Sihphir Pastor Bial Kohhran Hmeichhia	₹ 10,000/-	IV. THIL DANG PETUTE :		
5. Ngopa Pastor Bial Kohhran Hmeichhia	₹ 13,000/-	1. KÏP, Nisapui Pastor Bial	Thutthlengsei ngenchhan nei leh Cushion	
6. North Hlimen Pastor Bial Kohhran Hmeichhia	₹ 17,610/-	2. Bâwngkâwn Pastor Bial Koh. Hmeichhia	Naupang Ward tân Oxygen Concentration leina tûr ₹ 50,000/-	
7. Upa Lallâwmchhûnga, Saikhamakâwn	₹ 1,000/-	3. KÏP, Suangpuiâwn Pastor Bial	Hmunphiah 100	
8. Zonuam Pastor Bial Kohhran Hmeichhia	₹ 10,000/-	4. YMA, Republic Vêng Branch, Aizawl	Mitthi khuhna puan 10	
9. Zohlui, Zârkwat	₹ 3,500/-	5. Keifâng Pastor Bial Kohhran Hmeichhia	Student Nurses Hostel Locker man ₹ 45,000/-	
10. Zorinawmi, Zârkwat	₹ 3,500/-	6. Pi Lalrinmawii, Mission Vêng	A pasal Lalminglana (L) hriatreg nân NCB tân Wall Clock 1	
11. Zodinliana, Mission Vêng	₹ 4,000/-	7. Maubâwk West Kohhran	K. Ward tân Book Shelf 2	
12. Lawngtlai Bethel Kohhran Hmeichhia	₹ 2,000/-	8. T/Upa Lalfakawma, Dâwrpui Vêngthar	Mobile Clinic huna Papsmeat tih nân ₹ 1,000/-	
13. Chawngtlai Phâivêng Kohhran	₹ 5,500/-	9. Pi Sainingluaii, Bûngkâwn, Aizawl	Mobile Clinic huna Papsmeat tih nân ₹ 1,500/-	
14. Vânlalhmuaka, Keprân	₹ 500/-	10. Dârlâwn Vêngthar Bial Koh. Hmeichhia	Hmunphiah 330	
15. Saitual Pastor Bial Kohhran Hmeichhia	₹ 10,000/-	11. Ruatsânga & family	Pi Puii In, Room No 111 tân thu ziak mawi tak	
16. Ramhlun Vêngthar Pastor Bial Koh. Hmeichhia	₹ 20,000/-	12. Hmunpui Kohhran Pavalai Pâwl	Hmunphiah 70	
17. Lalsanglûra, Durtlâng Mêl - 5	₹ 1,000/-	13. John Lalneihsiana, Synod Hospital Campus, Durtlâng	Laboratory tân Refrigerator (Rs 36,500/- man)	
18. Tlungvêl Vêngthar Kohhran Hmeichhia	₹ 10,000/-	14. KÏP, Thuampui Pastor Bial, Aizawl	K. Ward tân Revolving Chair 2	
19. Bairabi South Kohhran Hmeichhia	₹ 2,000/-	15. KÏP, Kângmun Pastor Bial	Hmunphiah 100	
20. Republic Vêng Pastor Bial Kohhran Hmeichhia	₹ 30,000/-			
21. Zuangtui Pastor Bial Kohhran Hmeichhia	₹ 10,000/-			
22. Dr. Lalmalsâwma D-3 Enterprise, Kulikâwn	₹ 2,500/-			
23. Andrew, Kolasib	₹ 1,000/-			
24. Upa Lalfela te chhûngkua, Thuampui Vêng, Zâwlnuam	₹ 5,000/-			
25. Hming thup	₹ 500/-			
II. GRACE HOME TÂN PETE:				
1. Bambini Bravi Montessori, Chhânari West, Aizawl		Damlo Khum pakhat man ₹ 10,000/-		
2. Central KÏP, Synod Office, Aizawl		Cook hlawh atân ₹ 3,000/-		
3. Zonuam Pastor Bial Kohhran Hmeichhia		₹ 15,000/-		
4. Zuangtui Pastor Bial Kohhran Hmeichhia, Aizawl		₹ 10,000/-		
5. Chawngtlai Pastor Bial		₹ 2,000/-		
6. Bâwngkâwn Chhimvêng Kohhran, Aizawl		Portable Xray leina tûr ₹ 2,00,000/-		
7. Pu Rohmingthanga Colney & family, Ramhlun Vênglai, Aizawl		₹ 2,000/-		
8. KÏP, Chawngtlai Branch		- Rs. 2,000/-		
III. THISEN PETUTE		UNIT ZAT		
1. KÏP, Edenthar Pastor Bial		31 Units		

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lâwmthu kan sawi tak meuh meuh a ni. Hêng in thilpêk kan dawnte hian dam lo awm man harsate thlamuang takin a awmtîr a, Hospital mamawh tam tak min puhruksak bawk a ni.

Sd/- REV. R. RAMDINMAWIA
Chaplain,
Synod Hospital, Durtlâng.

SYNOD REVIVAL MEET VAWI 8-NA TLUANG TAKA HMAN A NI

June ni 21-23, 2019 chhûng khân Synod Revival Meet vawi 8-na chu Republic Vêng Kohhran Biak Inah tluang taka hman a ni. A thlengtu lamin an chhinchhiah dân chuan meet tan zân hian team membar riak lut 247 leh lînga kal 241an awm a; team membar ni lo, riak lûta chhimtu paruk an awm bawk. Meet thupui atâna Synod Revival Committee-in a thlan 'Pathian duh zâwng' tih chu mi pasarihin an sawi.

June 21, 2019 (Zirtâwpni) zân aţangin Pathian biak inkhâwm tan a ni a, a tan zân hian Rev. Lianhmingthanga Sailo, Sr. Executive Secretary-in Pathian thuchah a sawi a, Pathian biak inkhâwm hrang hranga thu sawitute chu - June 22, 2019 (Inrinni) chawhmaah Upa Lalchhanhima Hname (Mi Lungngaitte Thian); chawhnua Pu R. Lalnunkima (Kraws Sipai); zânah Rev. Dr. C. Chawngminglana, Synod Revival Committee member. June 23, 2019 (Pathianni) chawhmaah Rev. R. Vânlalnghaka, Synod Secretary; chawhnua Pu R. Zaihmingthanga (Gospel Thunder); zânah Synod Moderator Rev. R. Lalhmingthanga te an ni.

Inkhâwm apiang hian zaipawl pahni emaw pathum emaw an zâi ziah a, inkhâwm bânah

lênkhâwm thin a ni bawk. Kumin Revival Meet hi a vawi 8-na a ni a, Synod Revival Meet neih kum leh neih tawnate leh thupui hrang hrangte hetiang hi a ni :

- 2012 Mission Vêng Kohhran: *Maichâma mei a nung reng tur a ni* (Lev 6:13)
- 2013 Tuikual Kohhran: *Harhna dik* (Sam 80:18)
- 2014 Electric Vêng Kohhran: *Lal Isua zui* (Lk 9:23)
- 2015 Zârkwat Kohhran: *Rinawmna* (Thup 2:10)
- 2016 Bûngkâwn Kohhran: *Thlamuanna* (Jn 14:27)
- 2017 Ramthar Vêng Kohhran: *Min tiharh leh dâwn lo'm ni?* (Sam 87 : 5)
- 2018 Bâwngkâwn Kohhran: *Sim rawh u* (Mt 4:17)
- 2019 Republic Vêng Kohhran: *Pathian duh zâwng*.

Synod Revival Department hnuaiah hian Speaker 69 an awm mêk a, kohhrante sâwmnaa tih chhuah an nih thin bâkah Sihphir Neihbâwih-a Camping Centre-ah thla tin Gospel Camping vawi khat buatsaih thin a ni a, June 2019 thleng hian Camping vawi 50 buatsaih tawh niin, campers 5,880 an lût tawh a ni. Kum 2017 March thla aţang khân Aizawl khawpui dai leh khaw chhûng hmun t henkhatah 'Operation Nehemia' rawngbâwna kalpui thin a ni bawk.

KOHRAN HRIATTIRNA

Synod Bu 2018 la la loten Synod Office, Mamawh lamna hmunah mahni kohhran chhûnga Minister, Pro Pastor, Upa leh Pêm Upa leh Kohhran copy tûr lam theih zêl a ni e. Financial Report Bu (2018-2019) erawh chu chhuttîr mêk a ni.

HNA RUAK DIL THEIH

Mizoram Presbyterian Kohhran hnuaiha hêng hnate hi a ruak a, kum 18-35 inkâr, ni 16.8.2019-a kum 18 tling, kum 35 la pumhlûm lo, zûk leh hmuama fihlîm tân dîl theih a ni. Hna dîlna Form chu ni 8.7.2019 aţangin Synod Office (Aizâwl/ Lunglei)-ah lâk chhuah theih a ni ang. Application form man hi ₹20/- a ni. Hna dîlna form-ah hriat tûr pawimawh tihlan a ni ang.

1. *Synod Hospital, Durtlâng-a thawk tûr:*

DOCTOR (Contract) – 2 posts

*Thiamna: MBBS of any recognised University
Hlawh: Synod hnuai Contract rate*

2. *Presbyterian Bible School, Mission Vêng-a thawk tûr leh Masih Sangati Kendra, Bâwngkâwn-a thawk tûr:*

PEON-CUM-CHOWKIDAR (Contract) – 2 posts

*Thiamna: Class VIII certificate holder
Hlawh: Synod hnuai Contract rate*

Dîl theih hun chhûng: Ni 8.8.2019 (Ningani). Tlai dâr 4:00 thleng.

Screening test/Exam: Ni 13.8.2019 (Thawhlehi) chawhma dâr 10:30.

Interview: Ni 16.8.2019 (Zirtâwpni), chawhma dâr 11:00.

(Doctor hna dîlthe tân Screening test/exam a ngai lo vang.)

Sd/- Rev. Lianhmingthanga Sailo
Secretary
Synod Service Board

NGENNA LEH LÂWMTHU SAWINA

Kohhran Pavalai Pâwl chuan hmasâwn zêlin tûnah hian Pastor Bial 78-ah bial huapa din a ni tawh a. Bial KPP dîng tawh si, Synod Office-a la inhriattîr loten Revival Office-ah a hma lama inhriattîr zêl tûrin kan ngên a che u.

Kohhran Pavalai Pâwl din chhan leh thil tumte tihlawhtling tûrin mahni hmun theuhva ţan la thar tûrin Revival Committee chuan tualchhûng leh bial tina KPP-te a ngên a. Thawk ho tama, inpumkhatna ţa nei zêl tûr leh khawi hmunah pawh mal tlat ngam pavalai ni tûrin kan insâwm thar leh a. Lal Isua leh a kohhran tân kan hun ţa i hmang ţangkai zêl ang u.

June 29, 2019 khân Revival Camping Centre, Sihphîr Neihbâwih compound sâmb faiin Ramthar Vêng Pastor Bial KPP mi 45 zet hnatlângin an thawk chhuak a. An inpêkna leh an hnathawhte avângin Revival Committee-in lâwmthu a sawi a ni.

Sd/- REV. K. ROLUNGMUANA
Director
Synod Revival

2020-A ZIR TÛR

Nakkum (2020)-a Puitling Sunday School zir tûr **'Estheri leh Thuhritu'** hrilhfiarna chu a ziaktu Rev. K. Lalpiangtharan a ziaak zo va, chhut tûra buatsaih mêk a ni.

SHSS MULTIPURPOSE HALL HAWN A NI

Synod Higher Secondary School (SHSS)-a Hall lian ţa tak, Multipurpose Hall chu July 9, 2019 (Thawhlehi) khân Synod Moderator Rev. Lalhmingthangan a hawng. Hall hawn inkhâwm hi Executive Secretary i/c Edn., etc. Rev. K. Lalrinmawian a kaihrui a, Principal Pu Lalvêna Hnamtein sawm bikte a hmêlhriattîr hnuah hall sak chanchin a sawi a. Synod Moderator-in Pathian ropui nân hall a hawn hnuah thuchah a sawi zui nghal. Principal lo ni tawhten thu tawi têt tawi lehni, Pi Zirkûngi, Vice Principal-in lâwmthu a sawi a; Rev. R. Laldinthara, Mission Vêngthlang Bialtu Pastor-in Malsâwmnain inkhâwm a ţin a ni.

SHSS Multipurpose Hall hikum 2013 aţangin sak ţan a ni a, hemi kum aţang hian budget-ah dah chhoh zêl a ni a, sak nâna budget ruahman hi chêng

nuai 674 zet a ni a, hawn ni thlenga sênsô zât chu chêng nuai 518 a ni. Thawh zui tûr la awmte pawh budget-a sum dah hian a daih theih beisei a ni. Mizopa chhiara chhâwng sarihnaah hall hi a awm a, hall hnuai chiaha hian Vice Principal office leh zirtirtute inhmu khâwmna pindan te, naupang damlo dah lailâwkna pindan te siam a ni. A hnuai lam chhâwng ngaah hian zirna pindan (class room) 17 la awm tûra ruahman a ni. Hall zau zâwng hi a dung fit 91 leh a vâng fit 52 (91ft.x 52ft.) a ni a, ţhut nuam tâwk vêlin thutthlengsei 330 rem theih a ni a, zirlai 1,300 zet a chhûngah hian an ţu leng a ni. Departmental work-a kalpuiin hna viltu (supervisor) ruaia sak a ni a. Mission Vêngthlang Kohhran Light Committee-in hnatlânga an puiah avângin thawktute an lâwm hle.

SYNOD MODERATOR-IN INTER-CULTURAL CENTRE A HAWNG

July 8, 2019 khân Synod Moderator, Rev. R. Lalhmingthangan Aizâwl Theological College-a hnam hrang hrang thil tih hona hmun tûra ruahman 'Inter-Cultural Centre' a hawng. Centre hawn inkhâwm hi Rev. Dr. Vanlalngâka Râlte, ATC Principal-in a kaihrui a; Sr. Executive Secretary Rev. Lianhmingthanga Sailo a ţawngţ ai hnuah he in duangtu Frederick Malsawmzualan a sak dân chipchiar a sawi. He in sak hna viltu hi Pu R. Zoremsiama, Durtlang Leitan a ni. Hawna inkhâwmah hian Synod Theological Education Board member-te, ATC thawktute, zirilaite leh mi sâwm bîk an kal ţa hle.

Inter-Cultural Centre sak hna hi kum 2012 aţang khân CWM hma lâkna chi khat tihna hmun (Face to Face Inter-Cultural Centre) tûra buaipui ţan a ni a; kum 2014 February thla aţangin sak ţan a ni. He in sak hi hlâwm khatna leh hlâwm nhinna (Phase 1 leh 2)-a ţhen a ni a; tûna hman theiha sak zawh

tâk hi hlâwm khatna a ni. He Centre-ah hian Mizopa chhiara chhâwng li awmin, mikhual thlenna pindan nuam leh changtlung tak tak 20 leh thil zir hona pindan (Seminar Room), mi 120 leng thiau pathum a awm a. Thut hah chawlhna nuam tak te, a ţûl apiang tih nâna hman tûr pindan (Utility Room) te, ei leh in siamna pindan leh mi 40-in a ruala chaw an ei theihna pindan te pawh a awm a ni. Zir hona pindan kawtah hian khual chhâwnna hmun zau tâwk tak zuah a ni bawk. Tûna sak chin hi square feet 19,159-a zau a ni a, hemi chinah hian Rs. 3,71,53,670/- sên a ni.

A hlâwm nhinna (Phase 2) hi puipunna in lian (Auditorium) tûr a ni thung a. Inter-Cultural Centre chunga sak chhunzawm tûra ruahman a ni. Mi 800 len theihna tûra duan he puipunna in sak nân hian Synod chuan Rs. 2,17,53,000/- a ruahman a; kumin aţang hian sak ţan theih beisei a ni.



SYNOD BOOKROOM REDUCTION SALE

July 8 - 13, 2019 chhûng khân Synod Bookroom chuan a hnuai Branch hrang hrangah leh Distributor hrang hrangah Reduction Sale a kalpui a, Synod Bookroom lehkhabu (English leh Mizo) Bible, Kristian Hlabu, Kohhran mamawh, School naupang mamawh tinrêng leh Stationery item chi hrang hrangte a man pangngai aia za zêla 10-50 (10%-50%)-a tlâwmmin an hralh a ni. Kum danga la tih loh kumin hian Distributor-te pawhin Reduction Sale hi an kalpui ve a ni.